

豫章叢書

第〇九冊

殘

章

策

書

卷之七

字雲巢文集卷四

武寧盛大謨于埜著

謝孝子傳

南豐謝秋水以理學傳其家而從子德健曾孫身耘以孝聞德健字子強少受學於秋水聞古人篤行則瞿然興父漱竹爲秋水弟性豪邁喜遊入蜀十餘年不歸子強日夕痛戚有議昏者曰吾有父不得侍何昏焉遂涕泣請命於秋水竟往蜀而漱竹已至打箭壩有室生子矣及相見父子抱大哭留數歲漱竹又遊交趾久之相傳已死當是時逆賊吳三桂反烽戍

戒嚴水陸梗絕子強獨身荆莽間道重趼藍縷饑渴
瀕死者數矣乃卒達交趾踪之不可得日行野塚間
號哭哭七日夜不絕有逆旅隣老聞哭聲指其處遂
得負骸以歸程山諸君子爲詩文以紀之身耘號植
庵讀書力行平居伺父母所欲父充之爲秋水孫好
流覽山川與賓客飲酒歌詩連日夜每佳辰則請所
之執榼飭簋以待酒後興闌老人倚杖而歌聲琅琅
出金石四座油然植庵屏息侍喜不能言已而目瞶
眩藥勿已欲賦詩輒命人書植庵惄然曰父老矣目
衰何以自娛乃鷄鳴起以舌舐之返液滋其目凡二

十日日乃如故比卒痛哭不輟凡數歲葬於天馬山
山高數百仞路蛇盤鳥仄壯夫惴惴不可上植庵年
六十餘攀度上下且行且泣凡五日不少哀南豐人
皆稱之曰白頭孝子也

曰儒者言性命自南宋以來其書浩渺滋蔓後先相
襲謂之理學於是天下別有其名謨嘗與植庵子鳴
謙論學以五達道爲本人之性命寓焉子貢曰性與
天道不可得而聞也而後人欲以不可聞者聞之其
賢於聖人與嗚呼如秋水者眞理學矣

鄭節婦傳

鄭節婦姓劉予外兄厚淑之室也予少從母夫人省
外家時外祖母八十健食舅氏亡恙二外兄齒髮方
盛而節婦已生一子吾母與外祖母時時抱弄爲嬉
戲相顧而樂予侍其側山由然甚適也外祖母嘗顧
節婦曰吾守鄭氏四十餘年乃得見曾孫吾何恨於
是母夫人獨愛節婦節婦性柔婉侍太祖母得其歡
心又能怡其姑妯內外無間言母夫人益賢之已而
外祖母見背外兄憂毀成疾節婦日夜涕泣委曲調
藥餌一歲竟亡節婦廢食不欲生願所生兒尙孩乳
又舅姑在堂有家婦任勉而起當是時舅氏孤立有

二子後先並夭喪鄭氏數世相視唯節婦一子母夫人痛哭不輟又家素豐舅氏不治生產中落而節婦苦志撫其子以有成及冠母夫人尚在喜且慰曰吾門之幸也今節婦年且五十而其子已軒然丈夫又生二孫竝能讀書以復鄭氏於盛節婦猶抑抑悲哀不衰距其夫亡時已三十餘年矣嗚呼難矣節婦父某母某氏子曰德榮

曰外祖積書甚富謨少嗜古乞子書一二帙節婦不予且曰此先人所貽吾將以穀其後君何有焉嗚呼節婦亦賢矣哉

蓮雲道士傳

李蓮雲武寧楊浦人幼業巫能集風雨役鬼物背隆
類橐駝人呼曰駝道士爲人倜儻不羈善訴諸棲無
定息遇山水可意則築茅携妻子以往意有所屬則
又他之歲常數徙於書無所不覽獨好離騷敏於詩
然以詩爲戲口千百言傾口出往往有至者雖精思
覃慮無以上文士多從之遊然不可繩以禮法飲酒
博奕睥睨一切誕謾自放醉則褻譏當世名公巨卿
大賈若隱閨秀下至胥吏傭保輿丐類爲招魂汪洋
恣睢唯其所如無所紀極家貧人以巫請亦輒往然

以巫爲戲時則變聲調詠金滕天問爲人釀病以易
酒食嘗禳隣家日中其婿欲返外氏且留與蓮雲食
飲蓮雲故執笏鞠躬上言津津不得息婿去大笑而
罷所善蕭露瀼能詩蓮雲得巫錢則沽酒就露瀼飲
連日夜賦詩酒盡乃復爲巫去晚慕屈原遊沅湘詩
益豪然困甚常着敗道服纍纍行市中乞食有女工
於詩不偶竟鬱悒死

曰蓮雲隱君子也其中無亦有不可者難與人言邪
然卒窮困以死悲夫玉清有三鹿道士善言艷情喜
近文士予讀書磊思巢夜半三鹿持酒數甌舌半本

侍予几飲盡乃退予嘗問曰子知書乎三鹿曰吾不解書吾聞讀書無能人李蓮雲云三鹿姓方

張雲新傳

予友張君雲新性簡穆不喜仕進讀書爲文務以適意嘗獨居深坐終日闐然有聞者或徐起微視冷笑少復還坐如故時與予同學予始六七歲每嬉戲其旁輒書古字相問啖以饌果良久乃去君固愛予予亦不以爲意也比予稍長知讀書遊名郡大邑出入人文間頗自棄取年少氣盛不能俯仰隨人議論文章與世摭摭叔季而外無可與言旣爲人所擯斥又

久於外而不一歸凡鄉黨後先及素所來往相親識
之人率皆棄絕已而子營劍谷講學於磊思巢君一
日來謁且執予手日子與子學時子尙孩今乃至此
予方訝其久而不得見又念少時交遊已盡而君尙
如此及視君之髮則已皤然就白亦又悲子年已冠
而君齒漸衰矣君少多病補諸生不第屏跡深山閉
目獨坐終歲扃戶雖隣人亦罕有見者自子棲劍谷
乃始出見子月或數至坐則移日嘗曰吾非不欲爲
古人苦於病又無與力者而止於此吾唯一子唯能
聽命吾死無恨已子感其言又重以託至今十餘年

君已歿而其子且壯予亦忽忽四十矣君故善琴喜飲酒時或微醉取一曲以自適然非其人卒不與鳴而飲也年四十餘卒于一日菊

揭暄父子傳

揭暄字子宣廣昌人父衷熙母萬氏衷熙明諸生負經濟才日痛憤天下事不可爲往往周繞堂室對暄而泣相視欷歔不已及遊金陵會大兵破維揚至瓜洲方駐師衷熙登金山望兩軍相持私爲籌畫久之熱視文武吏皆闕茸無可與言者乃還暄少有奇氣喜論兵慷慨自任獨閉戶精思得其要妙著爲兵經

戰書皆古所未有學使吳炳見之驚曰此異人異書也南都沒衷熙益痛傷暄發憤舉義與撫州揭重熙同邑何三省駱而翔後先竝起於是唐王辟衷熙爲推官暄爲職方司主事父子義聲奕奕震江閩間已而衷熙護餉同友人間道由白水鎮遇賊取友去衷熙曰同王事也何可獨生復返追友賊怒執友出露刃衷熙大呼以身翼之賊遽刺友并中衷熙死時暄尙經營閩事也暄入閩念天下日危激切不自安上言天時地勢人事及攻守戰禦機要凡十策王皆嘉納之以尙書郭維經請遂調江西副吳炳甫行又命

安撫閩總諸營及贛州聞父難痛哭歸日夜枕戈磨
刃圖所以報卒擒賊獻墓門斬首醺血以祭於是閩
汀已失而吳炳入粵矣遂深居林藪簪冠野服與子
匡聞嗚咽幽抑以終所善方以智邱維屏游藝甘京
皆名人著有性吳兵戰及禹書寫天新語傳世匡聞
者幼能文爲吳炳所才亦棄諸生而隱初衷熙之受
害也賊質其骸以要暄萬氏知書有智畧率家人百
十持刀槊火器昇浮竹夜襲賊所取骸順流疾歸賊
奪氣竟不敢追衷熙字靜叔順偉好潔瞻視矍如善
嘯工古文詞嘗作金陵遊紀以勗暄云

曰予讀國朝所修明史闡揚大節雖起兵謀復無益於事而記載獨詳其所以涵養人心而風勵天下者有至意焉揭氏三世抱忠義以沒世皆皦然而不滓不幸而淪落下邑卒無以自明於天府悲夫

家譜忠烈傳

博分彌俊號逸園少立節概與其叔父潛明春秋爲縣學生並有文名以世亂不得用困於草野乙酉闖寇至鄉鄰竄匿公方危坐讀書神色端偉賊相視不敢犯公厲聲曰逆賊而至此邪明天子深仁厚澤而祖若宗生息二百餘年而故反耶吾王家秀才義不

可辱速死唯幸遂以杖撻賊賊怒脅公行公益罵不絕口竟受害公室林氏素知書又從公學春秋益明大義至是避亂別所聞公遇禍泣曰夫子死得其所吾何爲獨生乃與其子婦某相抱赴江流死女服姑年十七以罵賊不屈死季子翥亦死

曰明紀所書汪偉夫婦以忠顯人至今稱之公一門遭難死於節烈者凡五人然皆不見於史而卒湮滅以無聞其於沒世何如也

家譜貞節傳

盛氏善才祖文郁公初籍錢塘許配仁和潘佳言子

有成未字成天死才奔喪會水淹舍漂成屍才痛哭
欲絕遂自矢終身不嫁及祖任武宣縣令祖父卒兄
弟家於寧才爲塋立石招魂以葬歲時拜祭上食涕
泣如雨才好性好書史常集諸弟婦講求古賢烈女從
容議論南坐授學如師生禮諸婦迭治茗果終日端
侍毋厭怠其弟原信早世婦亦亡遺孤如海如江才
撫之使受經泣曰汝長無負先人其後二子成立卒
大盛門晚以姪孫珙珥妻並新寡召入賦詩曰唯寫
子意珥妻李氏有誓章珙妻不答於是私愛李氏與
爲綢繆勉以苦節垂暮不倦年八十四卒葬於台窩